

# PONTIFICALIS ROMANI PARS PRIMA

## PONTIFICALE ROMANUM

Clementis VIII. ac Urbani VIII. jussu editum,  
postremo a Ss.mo Domino Nostro Benedicto XIV. recognitum et castigatum  
Venetiis MDCCXXIII. Apud Hæredes Balleonios  
Typ. ac Edit.

### DE MINORIBUS ORDINIBUS

Quatuor minores Ordines dari possunt extra Missarum solemnias, diebus Dominicis, & Festivis duplicibus: sed in mane tantum. Ordinandi omnes ad quatuor minores Ordines esse debent superpelliceis induti, cum candela in manu dextera.

### DE ORDINATIONE ACOLYTHORUM

Exorcistis ordinatis, Pontifex reassumpta mitra accedit ad sedem suam, vel ad faldistorium, ad cornu Epistolæ, ubi sedens cum mitra, oblato sibi libro & candela, legit tertium Graduale, vel tertium Alleluja, si sit infra Octavam Pentecostes. Interim a choro cantatur ipsum Graduale, vel Alleluja. Quo finito, surgit Pontifex, deposita mitra, & versus ad altare cantat quartam Collectam. Tum sedet, reassumpta mitra, & cantatur quarta Lectio. Interim accedunt duo Capellani cum libro & candela ante Pontificem, qui ex eo legit Lectionem ipsam. Quibus dictis, Pontifex revertitur ad faldistorium ante altare, ubi sedet cum mitra. Acolythy vero vocantur per Archidiaconum: Accedant, qui Ordinandi sunt ad officium Acolythorum. Et mox nominantur per Notarium, ut supra. Quibus coram Pontifice cum candelis in manibus genu flexis, Pontifex admonet eos, dicens:

Suscepturi, filii charissimi, officium Acolythorum, pensate quod suscipitis. Acolythum etenim oportet ceroferarium ferre; luminaria Ecclesiæ accendere; vinum & aquam ad Eucharistiam ministrare. Studete igitur susceptum officium digne implere. Non enim Deo placere poteritis, si lucem Deo manibus præferentes, operibus tenebrarum inserviatis, & per hoc aliis exempla perfidiæ præbeatis. Sed sicut Veritas dicit: Luceat lux vestra coram hominibus, ut videant opera vestra bona, & glorificent Patrem vestrum, qui in cælis est. Et sicut Apostolus Paulus ait: In medio nationis pravæ & perversæ, lucete sicut luminaria in mundo, verbum vitæ continentis. Sint ergo lumbi vestri præcincti, & lucernæ ardentes in manibus vestris, ut filii lucis sitis. Abjiciatis opera tenebrarum, & induamini arma lucis. Eratis enim aliquando tenebræ, nunc autem lux in Domino. Ut filii lucis ambulate. Quæ sit vero ita lux, quam tantopere inculcat Apostolus, ipse demonstrat, subdens: Fructus enim lucis est in omni bonitate, & justitia, & veritate. Estote igitur solliciti in omni justitia, bonitate, &

veritate, ut & vos, & alios, & Dei Ecclesiam illuminetis. Tunc etenim in Dei Sacrificio digne vinum suggeretis & aquam, si vos ipsi Deo sacrificium, per castam vitam & bona opera oblatis fueritis: Quod vobis Dominus concedat per misericordiam suam.

Post hæc Pontifex accipit, & tradit omnibus candelabrum cum candela estincta, quod successive manu dextera tangant, Pontifice dicente:

**A**ccipite ceroferarium cum cereo, & sciatis vos ad accendenda Ecclesiæ luminaria mancipari, in nomine Domini. **R.** Amen.

Tunc accipit, & tradit eis urceolum vacuum, quem similiter tangere debent, dicens communiter omnibus:

**A**ccipite urceolum, ad suggerendum vinum & aquam in Eucharistiam Sanguinis Christi, in nomine Domini. **R.** Amen.

Postea, eis genuflexis permanentibus, Pontifex stans cum mitra versus ad eos, dicit:

**D**eum Patrem omnipotentem, fratres charissimi, suppliciter deprecemur, ut hos famulos suos bene + dicere dignetur in Ordine Acolythorum: quatenus lumen visibile manibus præferentes, lumen quoque spirituale moribus præbeant: Adjuvante Domino nostro Jesu Christo; Qui cum eo vivit & regnat in unitate Spiritus sancti Deus, per omnia sæcula sæculorum. **R.** Amen.

Tum Pontifex ad altare se convertens, deposita mitra, stans, dicit: Oremus. **Et Ministri:** Flectamus genua. **R.** Levate.

Et mox Pontifex conversus ad eosdem genuflexos, dicit:

**D**omine sancte, Pater omnipotens, æterne Deus, qui per Jesum Christum Filium tuum Dominum nostrum, & Apostolos ejus in hunc mundum lumen claritatis tuæ misisti; quique, ut mortis nostræ antiquum aboleres chirographum, gloriosissimæ illum Crucis vexillo affigi, ac sanguinem & aquam ex latere ilius pro salute generis humani effluere voluisti: bene + dicere dignare hos famulos tuos in officium Acolythorum; ut, ad accendendum lumen Ecclesiæ tuæ, & ad sugerendum vinum & aquam ad conficiendum Sanguinem Christi Filii tui in offerenda Eucharistia, sanctis altaribus tuis fideliter subministrent. Accende, Domine, mentes eorum & corda ad amorem gratiæ tuæ, ut illuminati vultu splendoris tui, fideliter tibi in sancta Ecclesia deserviant. Per eundem Christum Dominum nostrum. **R.** Amen.

Oremus.

**D**omine sancte, Pater omnipotens, æterne Deus, qui ad Moysen & Aaron locutus es, ut accenderentur lucernæ in tabernaculo testimonii: bene + dicere dignare hos famulos tuos ut sint Acolythi in Ecclesia tua. Per Christum Dominum nostrum. **R.** Amen.

Oremus.

**O**mnipotens sempiterne Deus, fons lucis & origo bonitatis, qui per Jesum Christum Filium tuum, lumen verum, mundum illuminasti, ejusque passionis mysterio redemisti: bene + dicere dignare hos famulos tuos, quos in officium Acolythorum consecramus, poscentes clementiam tuam, ut eorum mentes, & lumine scientiæ illustres, & pietatis tuæ rore irriges; ut ita acceptum ministerium, te auxiliante, peregant, qualiter ad æternam remunerationem pervenire mereantur. Per eundem Christum Dominum nostrum. **R.** Amen.

**Post hæc, suggerente Archidiacono, Ordinati redeunt ad loca sua.**